

Na osnovu člana 13. stav 2. alineja 17. Zakona o principima lokalne samouprave Federacije Bosne i Hercegovine ("Službene novine FBiH", broj 49/06 i 51/09), te člana 24. i 68. Statuta općine Stari Grad Sarajevo – Prečišćeni tekst ("Službene novine Kantona Sarajevo", broj 20/13), Općinsko vijeće Stari Grad Sarajevo je na sjednici održanoj _____ 2017. godine, utvrdilo

(NACRT)

O D L U K A
O IZMJENAMA I DOPUNAMA POSLOVNIKA
OPĆINSKOG VIJEĆA STARI GRAD SARAJEVO

Član 1.

U Poslovniku Općinskog vijeća Stari Grad Sarajevo ("Službene novine Kantona Sarajevo", broj 23/14 i 48/16), u članu 20. stav (2) se mijenja i glasi:

"Predsjedavajući i zamjenici predsjedavajućeg Općinskog vijeća, svoju dužnost mogu obavljati profesionalno, što se utvrđuje prilikom izbora."

Član 2.

U članu 23. stav (1) , u prvom redu, iza teksta:" Za pripremanje i razmatranje" brišu se riječi : "prijedloga odluka i drugih akata" umjesto kojih se piše tekst:

"materijala iz svoje nadležnosti koji su u prijedlogu dnevnog reda zakazane sjednice Općinskog vijeća"

Član 3.

U članu 24. iza stava (6) dodaje se novi stav (7) koji glasi:

"(7) Ukoliko Općinski vijećnik, u toku trajanja mandata, istupi iz političke stranke, koalicije ili liste nezavisnih kandidata koja je učestvovala na izborima, te postane samostalni vijećnik, ukoliko ispunjava uslove propisane ovim Poslovníkom, ostaje član stalnog radnog tijela, u kojem se zatekao, do isteka mandata vijećnika u Općinskom vijeću"

Dosadašnji stav (7) postaje stav (8), stav (8) postaje stav (9), a stav (9) postaje stav (10).

Član 4.

U članu 26. na kraju teksta dodaje se nova alineja 17. koja glasi:

" - Komisija za rad sa mjesnim zajednicama."

Član 5.

U članu 27. dodaje se novi stav (4) koji glasi:

"(4) Članovi radnih tijela ne mogu biti lica koja imaju pravni ili ekonomski interes koji utiče ili može uticati na zakonitost, otvorenost, objektivnost i nepristrasnost u vršenju te dužnosti."

Dosadašnji stav (4) postaje stav (5), stav (5) postaje stav (6) i tako redom.

U isto članu mijenja se dosadašnji stav (7) , a sad stav (8) i glasi:

“(8) Zbog efikasnosti rada, mora se voditi računa da, u svakoj komisiji, nadpolovična većina njenih članova, posjeduje iskustvo i stručnost u oblasti koja je u nadležnosti radnog tijela, kako bi komisija mogla davati odgovarajuća stručna mišljenja prema potrebama i na zahtjev Općinskog vijeća.”

Član 6.

U članu 31. briše se stav (2).

Član 7.

U članu 32. u stavu (6) u trećem redu iza zareza se dodaju riječi:

“čime je ugrožen kvorum za odlučivanje,”

iza zareza dalji tekst ostaje isti.

Član 8.

Iza člana 49. dodaje se novi član 49a. koji glasi:

Komisija za rad sa mjesnim zajednicama:

- vrši nadzor nad provođenjem odluka Općinskog vijeća koje se odnose na organizaciju i funkcionisanje mjesnih zajednica,

Član 9.

U članu 52. stav (1), u drugom redu, iza riječi “najkasnije”, briše se postojeći tekst i piše:

“do kraja mjeseca januara naredne godine.”

Član 10.

U članu 55. stav (2) u drugom redu, iza zareza se briše postojeći tekst i umjesto zareza se piše tačka

Član 11.

Zadužuje se Komisija za propise i statut Općinskog vijeća Stari Grad Sarajevo da, nakon stupanja na snagu ove odluke, sačini prečišćeni tekst Poslovnika Općinskog vijeća Stari Grad Sarajevo.

Član 12.

Ova odluka stupa na snagu osmi dan od dana objavljivanja u “Službenim novinama Kantona Sarajevo”.

Broj: 02-49-
Sarajevo; mart 2017.god.

PREDSJEDAVAJUĆI
OPĆINSKOG VIJEĆA STARI GARAD
SARAJEVO

mr.sc. Jusuf Pušina

OBRAZLOŽENJE

I PRAVNI OSNOV

Pravni osnov za donošenje ove odluke sadržan je u članu 13 . stav 2. alineja 17. Zakona o principima lokalne samouprave Federacije Bosne i Hercegovine (“Službene novine FBiH”, broj 49/06 i 51/09) kojim je utvrđeno da: “Općinsko vijeće: “- donosi poslovnik o svom radu”, a članom 24. i 68. Statuta Općine Stari Grad Sarajevo – Prečišćeni tekst (“Službene novine Kantona Sarajevo”, broj 20/13) je utvrđeno da se Poslovnikom Općinskog vijeća uređuje “unutrašnja organizacija i način rada Općinskog vijeća”, u skladu sa Zakonom i Statutom Općine.

II RAZLOZI DONOŠENJA ODLUKE

Poslovnik Općinskog vijeća Stari Grad Sarajevo, u integralnom tekstu, je donesen u mandatu Općinskog vijeća 2012. - 2016. godina. Na početku mandata novizabranog Općinskog vijeća, “pretrpio” je jednu izmjenu koja se odnosila na način izbora predsjedavajućeg i zamjenika predsjedavajućeg Općinskog vijeća.

Međutim, u daljem radu Vijeća, pokazalo se da postoje nedostaci u regulisanju pojedinih odredaba Poslovnika, koji predstavljaju smetnju za rješavanje pojedinih pitanja, pa je, na inicijativu vijećnika, dogovoreno da se pristupi njegovima izmjenama i dopunama, kako bi se pojedine odredbe prilagodile načinu rada i potrebama Općinskog vijeća. Zbog svega navedenog Općinsko vijeće Stari Grad Sarajevo pristupa utvrđivanju Nacrta Odluke o izmjenama i dopunama Poslovnika Općinskog vijeća Stari Grad Sarajevo (“Službene novine Kantona Sarajevo”, broj 23/14 i 48/16), u kojem su dati prijedlozi za izmjenu samo pojedinih članova, kako bi se u javnoj raspravi svi zainteresirani uključili u razmatranje i predložili najbolja rješenja za dalji rad i funkcionisanje Općinskog vijeća.

III OBRAZLOŽENJE POJEDINIH RJEŠENJA

Član 1.

Odredbe člana 20. stav (2) se usklađuju sa odredbama Statuta Općine Stari Grad Sarajevo u pogledu načina obavljanja dužnosti predsjedavajućeg i zamjenika predsjedavajućeg Općinskog vijeća.

Član 2.

U članu 23. stav (1) je neprecizno navedeno koje materijale razmatraju radna tijela, u okviru svojih obaveza prema sjednicama Općinskog vijeća, te se ovakvim načinom definisanja pokušava riješiti ta nedoumica.

U istom članu, novim stavom (7) precizira se status samostalnih vijećnika u pogledu članstva u radnim tijelima – komisijama Općinskog vijeća.

Član 3.

U članu 26, a u skladu sa nedavno usvojenom Odlukom o izradi planova prioriternih projekata u mjesnim zajednicama na području Općine Stari Grad Sarajevo za period 2017.-2020.godina, predviđeno je formiranje novog 17-tog radnog tijela u Općinskom vijeću , Komisije za rad sa mjesnim zajednicama.

Član 4.

U članu 27. dodavanjem novog stava (4) se vrši usklađivanje Poslovnika sa Zakonom o sukobu interesa i Etičkim kodeksom nosilaca izvršnih funkcija, izabranih zvaničnika i savjetnika u Općini Stari Grad Sarajevo.

U istom članu mijenja se stav (7) iz razloga što je praksa pokazala, da se radna tijela sastoje od članova koji se, uglavnom, ne razumiju u materiju koju razmatraju jer nemaju odgovarajuću stručnost niti iskustvo u toj oblasti, a u komisiju se predlažu iz razloga ekonomske, socijalne ili druge prirode.

Član 5.

U članu 31. stav (2) se briše iz razloga što se odredbe istog ponavljaju u članu 32. stav (6) gdje su preciznije razrađene.

Član 6.

Dopunjuje se radi obrazloženja sankcionisanja neprisustvovanja sjednicama radnih tijela.

Član 7.

Razlozi dodavanja novog člana 49a su isti kao i u članu 3. ove odluke. Potrebno je da se, kao i za druga radna tijela preciznije formuliše nadležnost novoformiranog radnog tijela. Pored nadležnosti date u nacrtu ovoga teksta, u eventualnom prijedlogu teksta ove odluke, bit će nabrojane sve nadležnosti koje bi ova komisija dobila.

Član 8.

Članom 52. je regulisan način i rokovi donošenja Programa rada Općinskog vijeća. Tako je predviđeno da Općinsko vijeće svoj program, za narednu kalendarsku godinu, donosi, po pravilu, najkasnije do kraja tekuće godine. Istim članom stav (4), regulisano je da: “U izradi programa rada polazi se od programa Općinskog načelnika.”

Međutim, da bi se ispoštovao redovni postupak donošenja akta, ovo pravilo se, u praksi krši i program rada, svake kalendarske godine, biva usvoje na januarskoj sjednici kalendarske godine na koju se program odnosi.

Član 9.

U članu 55. stav (2) je regulisan rok sazivanja sjednice Općinskog vijeća, ali je neprecizno navedeno ko sjednicu saziva ukoliko predsjedavajući tu obavezu ne ispuni (predlagači za sazivanje su Općinski načelnik i 1/3 vijećnika). Postavlja se pitanje, da li Općinski načelnik, kao predlagač može sazvati sjednicu Općinskog vijeća, bez saglasnosti vijećnika.

Član 10.

Ukoliko se, Odluka o izmjenama i dopunama Poslovnika Općinskog vijeća Stari Grad Sarajevo, nakon provedene redovne procedure, usvoji, radi lakše primjene Poslovnika (koji će, pored osnovnog teksta, imati i dvije izmjene), potrebno je sačiniti prečišćeni tekst i isti objaviti u “Službenim novinama Kantona Sarajevo”.

STRUČNA OBRADA:

Stručna služba OV

PREDLAGAČ:

Kolegij OV